



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

Tir Yimym

tiryimym@aolima

tir yimym

TAPAK 8

Union minister Sonowal-i Lovlina atema dinner ayongzük

Afghanistan lenirtemi parnok aser linük asoshi raratsüla: Biden



VOL. XVIII NO. 299 (ADOK 299) DIMAPUR

YANGTEPNÜ (THURSDAY)

LUROI (AUGUST) 12, 2021

₹ 5.00

## COVID-19 Nagaland: 64 dak putet, 78 taneptsü angu & 6 asü

**Kohima, August 11, 2021 (TYO):** Bodbarnü Nagaland nung nisung 64 dak COVID-19 putet aser 78 taneptsü angu.

"Tanü COVID-19 puteta alir nisung 78 tashi taneptsü angu. Parnokji Kohima nung 32, Dimapur nung 16, Mokokchung nung 13, Mon nung 6, Kiphire nung 5 aser Longleng o Tuensang nung asemsem (3) lir. Parnok züngsema nisung 26,101 taneptsü nguogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni, tanü nisung 64 dak COVID-19 aliba putet. Parnokji Dimapur nung 22, Mokokchung nung 15, Kohima nung 8, Longleng o Wokha nung pungugu (5), Mon nung 4, Zunheboto nung 3 aser Tuensang nung 2 lir" ta paisa ashi.

Nagaland nung COVID-19 nungi taneptsü angurji 90.39% lir aser tang nisung 1,351 anepaludar, ta Dr Kikon-isa ashi.

Anogo ana lir sülen Bodbarnü Nagaland nung COVID-19 puteta alir nisung 6 asü. Kohima nung 3, Dimapur nung 2 aser

Tuensang nung 1 asü. Parnok züngsema tasür ajak agi 591 kümogo saka nisung 14 bo tanga tashidak ajanga asü, ta paisa metetdaksü.

"Tang tashi nung COVID-19 alitsü akok ta temolung melemi bilemba sample 283,046 tendangogo. RT-PCR ajanga 104,420, TrueNat ajanga 70,593 aser Rapid Antigen Test ajanga 108,033 tendang" ta Dr Kikon-isa ashi.

"Nagaland nung nisung 634,837 nem COVID-19 vaccine indang dose 797,817 agütsüogo" ta State Immunization Officer, Dr Ritu Thurr-ia metetdaksü.

Vaccine agirtemji frontline workers 60,836, healthcare workers 15,985, rishi küm 45 ser tempur 188,769 aser arishi küm 18 nungi 44 tsüngda alir 369,247 lir, ta paisa ashi.

Vaccine agirtem rongnungi nisung 162,980-i dose anaprong agiogo. Parnokji frontline workers 41,483, healthcare workers 12,647, arishi küm 45 ser tempur 105,681 aser arishi küm 18 nungi 44 tsüngda alir 3,169 lir, ta Dr Thurr-isa ashi.

## Arunachal Governor Mishra-i Mizoram repsema inyaksü

**Aizawl, August 11, 2021 (Agencies):** Bodbarnü Arunachal Pradesh Governor Brig. (retired) BD Mishra-i Mizoram Governor repsema inyaksü tenzükogo.

Mizoram Governor Haribabu Kambhampati temang anepalutsü atema sodi agia lir aser iba jagi President Ram Nath Kovind-i Mishra nem repsema inyaksü mapa nungloksü.

Bodbarnü Raj Bhavan, Aizawl nung Gauhati High Court judge Justice Michael Zothankhuma-i Mishra nem tezüngzüktep agidaksü.

1987 küm state anguba sülen Mishra ya Mizoram atema Governor 23 buba lir.

Mishra ya 1939 küm Uttar

Pradesh kobok Kathuatu nung aso. Pai Allahabad University nungi Arts nung Master's degree aser Madras University nungi M.Sc azüng. Iba sülen pai Jiwaji University, Gwalior nungi doctorate degree ka angu.

Mishra-isa University of Delhi nungi law degree angu. Pai College of Combat aser Defence Services Staff College, Wellington nung küm 5 tashi tesayur inyaka liasü.

1961 küm pai Indian Army nung infantry officer ka ama aden aser 1995 nung mapa nungi anisüngzüka liasü.

Mishra-i Sino-Indian War, Indo-Pakistani War 1965 aser Bangladesh Liberation War nung shilem agiogo.

## ATM nung sen maliba atema bank dang senchi achitsü

**New Delhi, August 10, 2021 (Agencies):** October 1, 2021 nungi ATMs nung sen maliba atema senchi achitsü ta Reserve Bank of India (RBI)-i Mongulbarnü metetdaksüogo.

"ATMs nung sen maliba indang khuret meyipa repringshidang nisungtemi timtem ajuruba ajitetogo" ta RBI-i ashi.

"Iba jagi banks/ White Label ATM Operators (WLAOs) ajanga ATMs nung sen shitak ayutsü atema maparen akangshitsü lemtet. ATM nung sen teti ayutsü atema parnokji mapang shia repringshitsü aser iba mapa

meinyakertem dang senchi achitsü" ta RBI-isa metetdaksü.

RBI-i 'Scheme of Penalty for non-replenishment of ATMs' osang metetdaksüdag "ATM ka nung ita nung ghonda 10 tema sen maliba tensa ajurura Rs 10,000 senchi achitsü" ta ashi.

"Iba ya white label ATMs nung süra, bank dang nungi senchi meshitsü. Ajisüaka, bank-i white label ATM operator nungi sen meshizüksü akok" ta RBI-isa ashi.

June 2021 tashi nung India nung bank balala indang ATMs 2,13,766 tashi lapoka lir.

## CANSSEA-i Chief Secretary dang mapa kar inyaksü ashi



All Nagaland State Service Employees' Association (CANSSEA) President, Dr. Ilang-i anir ketdangpurtemi Nagaland Chief Secretary, J. Alam, IAS den ajurutepdang agiba noksa angur.

**Dimapur, August 11, 2021 (TYO):** Confederation of All Nagaland State Services Employees' Association (CANSSEA)-i August 9, 2021 nü Nagaland Chief Secretary, J. Alam, IAS den ajurutepa shidi ka agütsüogo.

CANSSEA President, Dr. Ilang-i anir teshimtet nübotem den Chief Secretary den pa indang office chamber nung ajurutepa liasü.

Iba mapang Chief Secretary-i CANSSEA ketdangpurtem den ajurutepa atema pelaba metetdaksü aser CANSSEA

dang sorkar den amalitepa yariteptsü ayongzük.

"Asenok angatetepa külemi inyaka ora mapa aika inyaktetsü. Sorkar mapa inyakertem ya loktiliba atema tongtoret lir aser wara mapang asenok mapa lezmüka alidak lia public yaritetsü" ta J. Alam, IAS-isa ashi.

Paisa CANSSEA ketdangpurtemi agütsüba shidi nung aliba önüktem atema mapa inyaksü nangzük.

CANSSEA-i Chief Secretary dang teinyaksü ashiba rongnung sorkar mapa

inyakertem nem January 1, 2020 nungi June 30, 2021 tashi DA/ADA agütsütsü dena lir.

Parnokisa taoba Office Memorandum tem nung promotion, Revocation, Review/Modification nung küm lateta alibatem meyipa repringshitsü metetdaksü.

CANSSEA-isa promotion ajanga IAS Cadre nung shimokba aser State Civil Service aser tanga services, Rule of the Indian Administrative Service (Recruitment) Rules 1954 nung shimsü indang ashi.

## Manipur nungi Olympian shia nem sorkar mapa agütsütsü

**Imphal, August 11, 2021 (Agencies):** Tokyo Olympics nung India tenüng nungi shilem agir saisaponger ajak nem sorkar mapa ka ka agütsütsü ta Manipur sorkari nangzükogo.

"State cabinet-i Youth Affairs & Sports Department, Government of Manipur nung Olympians atema mapa 18 wazüka yutsütsü telemtetba agiogo" ta Chief Minister N Biren Singh-i metetdaksü.

Tokyo Olympics nung Manipur nungi saisaponger 5-i shilem agia liasü.

Kontha Ahallup yim nung India Men's Hockey team midfielder aser Bronze medallist Sangrakpam Nilakanta Sharma

pela agizükba sentong nung jembidang Biren Singh-i "state sorkari Olympians nem bendanga agüja Sangaitel tesem nung 'Olympian Park' ka yanglutsü" ta ashi.

Iba asoshi sorkari Imphal West District nung ali acre 2 shi lezmütsüogo.

"Sorkarisa Olympians atema Assistant Director mapa 10, medal angurtem atema Deputy Director mapa 5 aser Gold Medal angurtem atema Joint Director mapa 3 tasen adoktsüogo" ta Chief Minister Biren-isa metetdaksü.

"Sorkari games & sports renlokdaksütsü atema bendanga agüja inyaker. Iba ajanga

lanurtemi tashi angaba aser yimya tajung beshitsü tangatetba agütsütsü" ta paisa ashi.

"State sorkari drugs tebilemstü khuret samatsütsü atema meranga inyaker. Lanurtem yi ajemba aser mozü achiba nungi pila lidaktsütsü aser games & sports jangradaktsütsü atema sorkari mapa inyaker" ta Biren Singh-isa shisem.

Tanü hockey asayartem Nilakanta Sharma aser Sushila Chanu Pukhrambam na Bir Tikendrajit International Airport tonga arudang Chief Minister Boren aser Education Minister Sorokhaibam Rajen nati tena pela agizük.

## Himachal nung anentsüh aludang nisung 11 asü, aika anenbanga lir

**Shimla, August 11, 2021 (Agencies):** Himachal Pradesh kübok Kinnaur nung Bodbar anüngdang anentsüh tulu ka aludang nisung 11 taküm sama aser 30 shi samar bushitepdar.

Anentsüh ajanga Reckong Peo-Shimla highway shibang aser bus, truck den gari kar anenbanga lir. Shimla-i aoba bus gari nung nisung 40 shi mena liasü ta osang ajanga ashi.

Nisung 25-30 shi ka anentsüh agi anenbanga lir. Nisung 10 kümzükogo aser parnok mozü kidang anepaludar,

ta ketdangsur kati ashi.

Iba lendong nung yariteptsü atema Indo-Tibetan Border Police (ITBP) sepai 200 shi tesem tonga yokogo.

"Nisungtem kümzükba mapa taonung tashi mesüra mapang talangba agitsü akok" ta ITBP spokesman Vivek Pandey-i ashi.

"Iba lendong nung yariteptsü atema National Disaster Response Force (NDRF) jaokogo" ta Himachal Pradesh Chief Minister Jai Ram Thakuria metetdaksü.

"Ni police aser local

ketdangsurtem dang yariteptsü tetuyuba agütsüogo" ta paisa ashi.

Prime Minister Narendra Modi aser Union Home Minister Amit Shah naprongi CM Thakur den jembiogo aser akokba tashi yaritsü nangzükogo.

Tesüiba hopta ishika Himachal Pradesh nung tzunglu kanga aruba ajanga tesem aika nung anentsüh alua timtemer.

Taoba ita Kinnaur nungsa anentsüh aludang tourists 9 tashi gari nung mena lia lung agi anenbanga asü.

## Mkg nung anogo pezünü power shibangtsü

**Dimapur, August 11, 2021 (TYO):** TB Hospital area, Majakong Ward nung 33KV line enoktsü aliba ajanga Mokokchung nung anogo pezünü anepdang 9:00 ako nungi anepdang 11:00 ako tashi power

mangutsü.

Iba mapa inyaksü atema August 10, nungi 14, 2021 tashi 11KV line (Hospital Feeder) shibangtsü, ta Sub Divisional Officer, Mokokchung Electrical Sub division-i sangdong ka nung ashi.

Iba ajanga Sangtemla, Majakong, Penli, Artang aser Lijabalijen Ward tem nung power shibangtsü anungji nisungtemi iba timtem arema atatsü mepishir, ta SDO, Mokokchung Electrical Sub division-isa metetdaksüogo.

# Changtongya nung ali ketdangsüba training agütsü



Changtongya nung Department of Soil and Water Conservation, Mokokchung ajanga August 10, 2021 nü aluyimer nem ali temu ketdangsütsü asoshi training agütsüba mapang tangokba noksa ka yangi angur.

**Dimapur, Luroi/August 11 (TYO):** Department of Soil and Water Conservation, Mokokchung ajanga August 10, 2021 nü NMSA-SHC 2020-21 kübok Farmers field, Changtongya nung Soil Health Card aser Soil Health Management indang anogo ka training agüja liasü.

Iba sentong nung Changtongya Sub-division kübok yimsüng ti nungi arua dena liasü. Iba training mapang technical session aser field demonstration agia liasü.

Sentong nung adener aluyimer aser shisalen sayur pela agizükba o jembiba mapang, mendenpuba, Ruokuosietuo Dzuvichu, DSCO, Mokokchung ajanga Soil Health Card aser Soil Health Management kota tongtipang, ta rateta ashi.

Iba sentong nung Tsüngrem temoatsü jazüka Akangmongba, Pastor, Changtongya Baptist Arogo ajanga sarasadem.

Dr. KeviletsuKhate, Senior Scientist aser Head, KVK, Mokokchung ajanga tajungshi o jembiba mapang aluyimer dang aluyimba tsütsü renloksü asoshi ali temu junga anepalutsü asoshi temolung agütsütsü shia liasü.

Aluyimba ya mapang indoka mesüra südok-sünema sorkari senotsü teyari agütsüba agitsü asoshi masü saka nübur nüngdakba peritsü aser rongsenketzüng ajungkettsü asoshi inyaksüla aser kasa mapang mozü mamshi tanen makai alu ayimtsü yimyatem amshiba nung temolung agütsütsüla, ta pai ashi.

Soil Health Card ya ration Card den sako lir, aser tarutsü nung aluyimba aser iba dak sendakba project tem inyakba nung nüngdaksü.

Paisa Soil Health Card ajanga ashiba ama technical tsütsü teyari agitsü atema KVK aser Soil and Water Conservation Department dangi arutsü shia liasü.

Technical session nung Renbemo Nnullie, ACTO (Horticulture), KVK, Mokokchung ajanga "Enrichment of soil fertility through the use of green manures and bio-fertilizers" onük nung ajemdaker jembia liasü.

Iba sülen Samuel Sangtam, ACTO (Agronomy), KVK, Mokokchung ajanga "Different types of compost making and its uses" onük nung ajemdaker jembia.

Toshinenla Pongen, Junior Soil Conservation Officer, Mokokchung ajanga field demonstration mapang aluyimer dang ali indang sample bendentsü, sample bendenba mapang GPS amshiyim aser vermi compost amshia maparen balala inyaka sayua liasü.

Iba sentong tatami Soil Health Card aser vermi compost lemja liasü. Tatamsa Imotiba, Soil Conservation Assistant, Changtongya ajanga tepela ankep o jembia liasü.

# Dept. of Agriculture ajanga jangjashitsür

**Dimapur, Luroi/August 11 (TYO):** Osang kaket balala nung Imuhca-i August 02, 2021 aser August 06, 2021 nung "ATMA indang itasen agütsütsü mepishir" aser Chief Minister dangi "Nagaland nung aliba ATMA staff tem rapitsür ama amshiba" indang shidi züluba osangtem azüngba sülen Department of Agriculture ajanga ATMA Employee List jangjashiba nung iba nisung ya ATMA nung inyaker masü, ta jangjatet.

Iba osang zülusang ya ATMA nung inyaker kar kinunger mesüra ketdangsür mangmangdaksütsü mechi taila tenüng amshia alitsü südi, ta Department of Agriculture indang sangdong ka ajanga ashi.

Tang fiscal year 2021-22 atema itasen magütsütsüta dak sendakba nung, Department ajanga taoba financial year nung bendena aliba nungi April 2021 itasen agütsütsüta, koba COVID-19 tashidak wara mechi meinyaki aliba 'Cafeteria of activities' asoshi yua aliba nungi agütsü.

Government of India ajanga

tang fiscal year 2021-22 atema Instalment mezüngbuba magütsütsü liaka ATMA nung inyakerkem asoshi bilemja Department-i iba mera ya agi, ta ashi.

Ministry of Finance ajanga Single Nodal Agency (SNA) benokba yong Centrally Sponsored Schemes (CSS) kübok senotsü salatsü asoshi yimya tasen ka sangdonga CSS indang account ajunga ya July 1, 2021 nungi PFMS nung ka kumdaksütsü ashi.

Iba den külemi mapang agiaka Department ajanga SNA aser talisa ATMA Scheme inyakyonga aotsü meranger.

Nübu dak sendakba nung, Government of India ajanga agütsüba 2018 ATMA Guidelines nung, Contractual Employees (regular vacancy tem melena shimba) ya ATMA kübok post telemsa kar den lirumedema talila magütsütsü shia lir.

Iba atema State ATMA kübok aliba post tabu ajanga ya Walk-In-Interviews ajanga shimba aser mass media nung sangdongba ama masü.

Yamaji sorkari tentettsüba Requirement Board/Committee ajanga ashiba ama candidate ajunga ya Contractual Basis nung küm ka atema shimok aser CSS sentong den kasa alitsü.

State nung aluyimer asoshi ATMA Employees ajanga maparen balala inyakba asoshi sorkari meteta lir aser pelar, saka sorkar indang ozüng aser inyakyim kar lir, ta metettsüla.

Iba den külemi yimjak nung mesangdong dangi metokmeperi ketdangsür dangi bener arutsü asoshi lenmang aser yimya lir.

Lenir nübu tejangja Minister, Agriculture & Co-operation, G. Kaito den Agriculture Production Commissioner, Nagaland, Y. Kikheto Sema, IAS lenisüba kübok Department tajungtiba nung anir. ATMA staff dang o tajung ashiba aser ajungshiba ya itasen menur agütsüba mesüra magütsüba den kecha nunga sendaktepa mali, aser parnoki teti ATMA Employee tem densema mapa inyaker ajungtsü asoshi temolung agüja inyaker, ta sangdong ajanga ashi.

# Nagaland DIVA 2021 akoker anema o tamajung züluba aitsür

**Dimapur, Luroi/August 11 (TYO):** Dimapur nung July 21, 2021 nü agiba Nagaland DIVA 2021 tetoktepbba nung takok angur anema tawa social media (YouTube) nung Maongkala Imsong aser Tino Longsen nati o tamajung züluba asoshi mepelar aser tematiba jenjang nung khukhua aitsür, ta Dimapur Eastern Nagaland Students' Union (DENSU) sangdong ka ajanga ashi.

Tenati züluba ajanga takok angur yimya tepsettsüba kisüng masü saka Konyak/Eastern tsürtem ajunga mezüngmeshiba lir, ta ashi.

Nisung ana yagi par kin dangi kisüng masü saka Naga nungner ajunga asoshi maksü bener arutsüogo. Iba ama teshisadang makai o züluba ajanga timtem ajurur alir aser

anüdoklen kin tem temolung animesüngzükler aser ibai mezüngmeshiba ka lir, ta sangdong ajanga ashi.

East Police Station, Dimapur indang Office-in-charge ajanga FIR benoka ken o bushisüngdanba atema Union ajanga pelaba lemsateper aser ano tajungtiba nung ken o bushisüngdang aibelener nem tapet temerenshi agütsütsü ajungshir, ta ashi.

Iba ama mapa tamajung inyaker ya memerenshi yutsüra, tarutsü nung kasa ken o tali adoktsü aser Naga nungertem tsüngta tesempatep tali adokdaksütsü.

Shidak bilemba aser angatetba nüburtemi iba ama mapa ya meinyaksü aser aitsütsü ajungshir, ta DENSU sangdong ajangasa ashi.

# August 17 nü Nagaland SDG Vision 2030 sayatsü

**Dimapur, Luroi/August 11 (TYO):** Planning & Coordination Department kübok Sustainable Development Goals Coordination Centre (SDGCC) ajanga 'Nagaland SDG VISION 2030' Document aser 'District SDG Localisation and Integration Manual' sayatsü atema sentong ka Capital Convention Centre, Kohima nung August 17, 2021

anepdang 10:00 ako nungi ayongzüka agitsü, ta sangdong ka ajanga ashi.

Maneni state nung aliba department balala atema SDG India Index 2020-21 aser Multidimensional Poverty Index nung state-level workshop ka NITI Aayog ajanga ayongzüka akatsü, ta sangdong ajangasa ashi.



August 11, 2021 nü 75buba Independence Day nungtem nung Phek town temekek ajak lokti nübu toka merüktetbaa noksa nung angur.

# Committees of the Assembly nung nübu tasen shimogo

**Dimapur, Luroi/August 11 (TYO):** Commissioner & Secretary, Nagaland Legislative Assembly Secretariat, Dr. P.J. Anthony ajanga sangdong ka nung, 2021-2022 küm atema Committees of the Assembly nung tsünglanglen agüja aliba züngsemtem shimteto, ta

metetdaksü. Committees of the Assembly nung züngsemtem yamai alitsü: 1. Zhaleo Rio - Member aser Chairman, Committee on Estimates. 2. Yangseo Sangtam - Member, Rules Committee. 3. Namri Nchang- Member, House Committee.

# Nagaland Police ajanga National Flag Rally ayongzüksü

**Dimapur, Luroi/August 11 (TYO):** India nungner nüjiso ngur küm 75 ajungba nungte nung amungba Azadi Ka Amrit Mahotsav benjong nung shilem ka ama Police Headquarter, Kohima, Nagaland ajanga August 14, 2021 nü National Flag Rally Race sentong ka ayongzüksü.

Iba sentong ya anepdang 6:00 ako nung Secretariat Plaza nungi tenzüksü aser PHQ, Kohima anasa tembangtsü aser iba sülen PHQ main lobby nung sentong ka anepdang 8:00 ako nungi agitsü.

Iba sentong nung AIGP

(Prov), Temjensenla Jamir, NPS menden asütsü, Director General of Police, Nagaland aruba sülen National Anthem ya DGP Band ajanga atentsü aser Pastor, PUBC, Rev. V Rakho ajanga Tsüngrem temoatsü jazüka sarasademtsü.

Sentong nung IGP (Range), Limasunep Jamir, IPS ajanga tarur pela agizükba o jembitsü aser Mahila Band ajanga Vande Mataram ken atentsü. Maneni iba sentong nung DGP, Nagaland, T John Longkumer-i o jembitsü aser DGP Band aser Mahila Band ajanga kentenmenü sentong agitsü.

### Union minister Sonowal-i Lovlina atema dinner ayongzük



Taoba Assam chief minister aser tang union minister teinyakdak Sarbananda Sonowal-i Olympic medallist Lovlina Borgohain pelaa agizük dang tangokba noksa angur.

**Guwahati, August 11, 2021 (Agencies):** Taoba Assam chief minister aser tang union minister teinyakdak Sarbananda Sonowal-i Olympic medallist Lovlina Borgohain atema dinner ayonga agi. Mongulbarnü New Delhi nung par kidang Sonowal-i

Lovlina atema dinner ayong. "Küm ka dak tema lir sülen Assamese chiyungtsü achir" ta iba mapang Lovlina-i Sonowal dang ashi. "Union Minister Sarbananda Sonowal-i ni jaokba atema kanga pelar" ta laisa metetdaksü. Assam tsür Lovlina

Borgohain-i Tokyo Olympics nung bronze medal takok angu. "2024 Olympics nung medal tajungba angutsü atema ni alizüng ayur" ta lai ashi. Vijender Singh aser Mary Kom na sülen Lovlina-i boxing nung India atema Olympic medal tasembuba nguteta liasü.

### Mizoram rehab centre nung nisung 115 dak COVID-19 putet

**Aizawl, August 11, 2021 (Agencies):** Tesüiba ghonda 24 tsüngda Aizawl nung aliba rehabilitation centre ka nung alir nisung 115 dena nisung 863 dak Covid-19 aliba putetogo. Tanü putetertem züngsema nisung ajak agi 46,320 kümogo, ta health department ketdangsür kati ashi. Phunchawng nung aliba Operation Kingdom Ministry

Home nung alir nisung 115 dak Covid-19 putet. Tesüiba ghonda 24 tsüngda COVID-19 puteta alir nisung ana asü aser tena züngsema tasür ajak agi 171 kümogo, ta ketdangsürisa shisem. Tanü putetertem rongnung tanur 147 aser Border Security Force (BSF) jawan 3 densema lir, ta paisa ashi. Tanü Mizoram nung Covid-19 agi shiranger 12,427

anepaludar aser nisung 33,722 taneptsü nguogo. Tang tashi nung Mizoram nung Covid-19 alitsü akok ta temolung meleme bilemba sample 6.95 lakh tendangogo. "Mongulbar tashi nung Mizoram nung nisung 6.41 lakh tema nem vaccine agütsüogo aser iba nungi 2.1 lakh-i dose anaprong agiogo" ta State Immunisation Officer Dr. Lalzawmi-i metetdaksü.

### ULFA-I-i Independence Day menokdang

**Guwahati, August 11, 2021 (Agencies):** Küm 40 dak tema nung tang mezüng atema ULFA-I-i Independence Day mokdang mesüra bandh mayongtsü telemtetba agiogo. Ajisüaka, parnoki Assam nung Independence Day amongba atema ashishitepa ashidang "Assam ya colonial

India nung kodanga dena maliasü" ta metetdaksü. ULFA-I-isa February 24, 1826 nü East India Company aser Burma tsüngda Treaty of Yandaboo nung sign asüba indang ashi. Burma aser East India Company indang tenangzüktep nung Assam balaka ta asüba agizük aser

British India nem magütsü, ta ULFA-I-i metetdaksü. India sorkari olemteptsü lenmang lapoktsü atema constitutional amendment ka asütsüla, ta parnokisa takhangba agütsü. "India-i Constitution aiben yanglushiogo. Anungji kodaser meyanglushitettsü?" ta ULFA-I-isa asüngdang.



East Wildlife Division DFO, Ramesh Kumar Gogoi-i Kaziranga National Park (KNP) nung mapa inyaker ka dena nisung ana güntok tezü shibelenba ken o dak sendakba nung apuba sülen agiba noksa angur. Tena ya Kaliabor Kuthari nung alir Abdul Ali aser Kaziranga National Park nung mapa inyaker Bimala Sakia na lir. (Golaghat, August 11)

### Taoba NDFB (R) züngsemtemi Aug 15 tashi nung Daimarychioktsü akhanger

**Baksa, August 11, 2021 (Agencies):** National Democratic Front of Bodoland (NDFB) (R) nung taoba züngsem noklang aikati Bodbarnü Baksa district nung parnok tanishir Ranjan Daimary chiokang ta takhangba agüja lungkak aitogo.

President Ranjan Daimary ya tepuokdak yua liasü. Pa August 15 nü tanga züngsemtem den külemi mechiokra, onoki tesashiba lungkak aittsü" ta paisa metetdaksü.

NDFB (R) züngsemtemi Barama Public field nung adenshir lungkak ait.

Taoba hopta NDFB lenmir Abhiram Basumatary-ia Kokrajhar nung Daimary chioktsü atema takhangba agüja liasü.

"Onok nisung 100 ka shi adenshir Ranjan Daimary chioktsü atema takhangba agütsür. Onoki Centre aser state sorkartem aser BTR mendenbuba Pramod Boro nungertem pa chioktsü atema mepishir" ta NDFB (R) züngsem kati ashi.

"Sorkari July 22 nü Guwahati Central Jail nungi Daimary anizüker Kahilipara, Guwahati nung aliba 10th ABPN camp nung takdang tila ka nung yua lir" ta Basumatary-i sorkar aitsü.

Parnokisa August 15, 2021 tashi nung Ranjan Daimary chioktsü atema mapang züngzüksüogo.

"Taoba mapang sorkari Daimary house arrest nung ayutsü ta ashi saka ibaji meinyak" ta paisa ashi.

"2020 Peace Accord magidang nungi NDFB founder

October 30, 2008 nü bomb atongtepa apokba ken o nung Ranjan Daimary dak tai tonglokja lir. Iba lendong nung nisung 100 tema asü aser 400 den teimba yiru.



Agartala nung media outlets kari par party anema inyaker ta The Indigenous People's Regional Alliance (TIPRA) chairman Pradyot Debbarma-i Bodbarnü ashi. Tripura nung media outlets kari lisopur ka nem parnoki bilemba jembidaksünür ta Pradyot Debbarma-isa metetdaksü. (Agartala, August 11)

### Manipur nung ED indang office lapokogo

**Guwahati, August 11, 2021 (Agencies):** Bodbarnü Enforcement Directorate (ED)-i Manipur nung mezüngbiba office lapokogo. Iba sub-zonal office tasen ya Imphal nung lir aser Guwahati nung zonal office-II kübok inyaksangshitsü.

Manipur state telongtet atema inyaktsü. Meghalaya yimtiba Shillong nunga kasa office ka lapokogo aser Bodbar nungi mapa inyak tenzükogo, ta ED-isa metetdaksü.

Bodbar nungi deputy director rank-officer ka lenisüba kübok office mapa nung mapa inyaktsü tenzükogo ta ED-i metetdaksü.

Enforcement Directorate (ED) ya Union Finance Ministry kübok inyaksangshir aser Prevention of Money Laundering Act (PMLA) indang mapa inyakba den külemi Foreign Exchange Management Act (FEMA) aser Fugitive Economic Offenders Act atema mapa inyaker.



## TIR YIMYIM YIMOBILEM (EDITORIAL)

DIMAPUR YANGTEPNÜ, LUROI (AUGUST) 12, 2021

### Ojang auyadi ?

**K**ibur maliba ki repranga orr ki kakkoka auyar ka pur, pa dang nai kechiba auyar ta asungdang dang, " chiyongsü maka sensak maremba agi auyar," ta langzü. Atangji, pa chiyongsü makatsüsa sensakbaji pa azümasenba agi asütsüa akok , iba jagi pa yimjak nung maksü tulu ajurutsüsa ataloker. Iba auersang taküm denji kodang asen government nung tuluba nungi tilaba tashi agi nübortem meyong shilem ser nung, nübortem nem magütsü ser kari pei share, kari pei meyong cut aser ano karibo pei meyong percentage aser commission ta agitetyonga aoba mapatem den medemdangdir, auersangi ki kakkoka auyaba jenjangjibo kanga tilaka danga ta asenoki angatetsü. Iba denji ano, taküm Comptroller Auditor General of India (CAG) osang nung metetdaksüba amato, department aika nung sen amshir ketdangsertemi kari bill tiyazü yanglua sen agizüker, kari tiyazü ita sen yanglua agir, ano karibo ita sen aser allowance tiyazü yangluba agi tenük masüng arrear dena tiyazü yanglua agizüker ta shidi süra, Nagaland nung kanga mazüngi inyakba 'Development activities' jibo nübortem meyong sen nungi pei pei share alemba aser tiyazü ita sen, allowances aser arrear yangluba mapatem ya asütsü. Ibai manguba Tsüngrem tsüngdang dang masü saka linük nung Hindu aser Muslim nunger tsüngdanga taaktsüka lir. Nagaland govovernment budget nung lezmükba sen ajak nung tulubaa pa yari aser tilabaa pa yari ta pei agitsü shilem kaka agitettsüba Naga nunger Khristan sobaliba tajung ka amai kümogo. Iba auyaba sen jagi ali alia ki yanglur, tanurtem züngdaksür, arogo nem tenla ki yanglutsü tenla agütsür aser mission tenla iba sen nung jagi abener. Joko, tamalen nungi shitakba nisungbo mali ser nung taila nisung tenüng nung ita sen agizüka chiyonga aruba manentet, nisung aika melentepa auyaba senji talila temoatsü ka angu ama agizüka agia arur. Item sen jagi tenla ki yangluba ya Tsüngremia kechi bilemstsü ? Item auyaba sen agi yangluba kidangji kechi ataloktsü ? Item auyaba sen agi züngdaksür tanurtemji tajung akümtsü asü makümtsü ? Item auyaba sen agi bendenba rongsentem ya küm kwika asen senmang kuma alitsü ? Iba auyaba sen agi Tsüngremer mission mapa inyaktsü tenla agütsüba arogoibo pelashishia agizüksü saka Tsüngremi agizüksü na ? ta asüba tasüngdangbatem asenok mulungjangi langzür melangzuma arur. Iba jagi asenok mulungjangi tipmedemdaksür. Nübortem meyong nübortem nem magütsü ser agizüka achiba agi takar akümbaji tajidaksüka lir. Laishiba shitak süra item ama rongsenji senmang kuma maotsü saka yakta samatsü. Apijemtsü Shin 13:11 nung ashir, " ajungben anguba rongsenji ajema akümtsü saka züsenba agi terara shibai bendendir, pa züintsü." Aji oda, asenokbo metetsümonga küm ishika lir toktsür aotsüba lima nung ya, anogo shia nübortem meyong shilem nungi pei share lezmüka kidangi bener aotsü dang bilemstsü na ? Asenokbo tanishir ser nübortem asoshi inyaktsütsüba mapa ajak nung commission agizüka amongtsü na ? Asenokbo nübortem dang lenmang tajung sayua tenzüker masü anogo shia pei office nung tiyazü bill dang yanglua service piyong amentsü na ? Kechiba asenoki yamai auyar ? Ita sen agi tebok masüngba agi asü ? Karaa takar kümnüba agi asü ? Apuani jangratema lidaktsünüba agi asü ? Tanurtem kaketrejui tajungi yoknüba agi asü ? Atangji, nisunger tenük süngdakbo maka, saka shibai jangratema alitsü bilema ochimashi mapa inyakdir timtema taküm atemtsü. Aji oda, shibai pei aaba agi tenüng masüng auyaba sen agi takar akümtsü merangdir, pa mapang tatsüka akatsüa akok saka pa nuk agi ngua pai auyaba rongsentem nungji tashikang dener yima aotsü aser aji kodanga mangutsü. Tanü asenoki tangar sen nungi share katizükba aser commission agiba ya, tesüsabo Tsüngremi asen dak nungi katizüker tim tangutsü purtem nem agütsütsü. Asenoki ki kakkoka arua sen mechimenuka aser oset tilaterikaa auyaa bener aoba indangbo kanga sashia jembir aser auersangji zükseta azüker. Ajisüaka, asen shilem agi asen ki matongdang tom nung sen crore aika chitsübabo asenoki memetetter aser metetyonga ola madoker. Joko, asen lima ya share katizükba, commission agiba aser tiyazü bill yanglua sen agizükba ochimashi lima masütsüla. Iba ya ozüng agi memelenshitetsü saka kija shiai mapa meinyak ser auyaa takar kümnüba aser jangratema linüba shisatsü ya endoktsü mulungtettsüla. Asenok auer kin masü saka ochishir aser meranga inyakba kin, anungji kodaser tangar sen agi asen sen kümer asen shilem agitettsü ? Kodaser nisung maliba ka indang ita sen yanglua agitsü ? Kodaser asenok ochishir kin nungi sotetba senso tajung auyaba sen agi yangluba kidang nümadangteta litettsü ? Kodaser nübortem meyong sen auyaba agi nübortem vote alia yimsüsür akümtsü ? Item takok aser tajangzük ajakji shitak masü, tiyazü. anungji lialir asen taküm aser kibonga tiyazü nung atemtsü ! Yamaji matemtsüsa asenokbo ojang auyadi aser ochi agi asen lima yanglushidi.

## OLEMSABANG ELECTION ASER TAMANGER

- Rev. Dr. Noklen Longkümer, Pastor Ungma

(Yashi adok nungi...)

**Vote agütsütetba tamanger asütsüla :**

Mapang tatsüka tsüngda asenoki election ajurutsü aser shir nemmeyongnem agütsüdir iba jagi taruba Sorkar yanglutsü. Shiba nem vote agütsütsü aji ne mulung. Anung kübok nisung shinga-ia ne temeten sota ayutsü, rakzüksü aser mesüzüksü makok. Election nung tashiyim agi kiralongra mapa inyaktepba ngua, vote agütsüi aotsü menundak mesüra election nung shilem agitsü kuli mali ta tsübua bilema lira, ibaji Tsüngrem tashi tulu koba agi züyim tzütelung kuma noktadkaja pei nübur nem atendangdaksü; aser lung nungi ayong adokdaksü iba tashi anema aposuba asütsü. (T. Ken 87:13, 16). Election mapang nisung shisatsüsam shiruru mesüka tamajung inyaker ket nungi Tsüngremi mekümzüktsü ama bilemer asü? Tanü kanga tesasatsüka arogotem nung ordained ministeri anir arogo nung tongti tenzükeri Tsüngrem maksüdakja ambangyim aser tashiyim inyaker tsübua agi vote magütsüi kinük nung atsükshishitepba ya asütsü. Tamanger ka tetsüba tanela nem amoksepdaaktsütsü Tsüngrem mulungba masü, kechiaser Pai ashir "Yimti yimjung bushiang, aser iba asoshi Kibuba dang maneni sarasademang, aser yimti madak Kibubai tesünep agütsütsü" (Yer 29:7). Anungji aruya-a aliba polling day nungjibo, Kibuba, shibai ozü lima dangi tesünep aser tekümzükba bener arutettsü, shibai senso ka temeten aser tashi wazüka yutettsü akok, shibai nübur ola anga-a Tsüngrem aser Pa nübur meimer, aser shiba chuba menden nung mendaktsütsü nai ajioka ali, parnok shimba nung shilem agitettsüsa onok nem shisatsü aser tasü tait tanela meküplokjang ta shitettsüla.

**Senso candidate inyakyim ya Tsüngrem den tashi raktepba lir :**

Nisung shia nem pei mulungsentsü-i aginua meimba shimtetsüsa teyanglur Tsüngremi yanglu. Kija shia nem Tsüngremi agütsüba temeten ya political party, yimtsung putu menden mesüra oda alima kin rangpen telungjem-ia (UNO) rakzüksü makok. Kechiyong kotak nung aliba aser alima nung aliba oset ajak, ngutetba aser mungutetba kechisa lir, oda chuba menden süshia, aintem süshia, ajak Pa asoshi yanglu aser ajak dang Pa tama aser ajak Pa dak sota alir (Kol. 1:16-18). Asen limai Osangtajung ain arur küm 150 ajungba 2022 amongtsü. Anungji tangbo akhidang limapur mapang mashi-malu ajanga mapa tamajung inyaka Tsüngrem anemertem kümer Pa nungi pila-a aliba jenjang nung malitsüla, koba tetezü nai kechi mulunger ibaji tangari masü nai dang lemtettsüla ta tamang aser tangatetba takang aliba shitakba senso ka asütsüla. Tsüngrem tashi dang nungi political party mesüra yimden tashi tuluba ta mashi angateta item tsübu agi ola matoki polling day kilung nung atsüka alitsüba mapang masü mesüra tim masü ta angatetba sensoi dang nübur ajangzüksüsa alima yimli yanglutsü ta metetdi. Political party dak mulung alemba aser teimla ayuba mapang süigo, kechiaser tangbo Tsüngrem taochi agi asenok nüchi kuma lir. Nüchi shisatsü atenba sensoi tamang makaba political party kimen, coup system, senso candidate ta mebilemer aser meinyaker. Tsüngrem O-i ashir, "Alima aser yangji aliba, alima aser yangji alirtem Kibuba meyong lir. Kechiaser pai aji züyim manung aser ayongtem manung yanglu" (T. Ken 24:1,2). Danieli ashi, "Teti tatem maka Tsüngrem tenüng temoatsü süang; kechiyong shisatsü aser tashi Pa meyong lir, Pai ali chubatem agiener aser mendaktsür; shisakar nem Pai shisatsü agütsür, aser tangatetba pur nem Pai temetetba agütsür." (Dan 2:21-22). Asen lima nuchi jenjang tanü aliba political party mesüra Naga political group dak mali, saka tematiba Tsüngrem kabu nung dang tesadang sovereignty (shared sovereignty) masü rangpen sovereignty (full sovereignty) lir. Item ochi kuli asoshi tanü tamangertem lungjemer "Clean election" inyakyim asoshi ajak Takoksang Tsüngrem dang sarasadema apusotsü ayonger. Iba clean election inyakyim tetezü -senso-candidate, coup system, kimen tenteter jabujari, chidiyongdi tesembatsü temenen mapatem anema amangbapur tanela tongpang lir. Iba tongpang koda raratsü? Mezüngbuba-tesüiba electiontem nung aseni inyaksaba temenentem nangzuka Pa taochi bushia ozü lima anebjang ta nüktzü ayong ama yima lumia tenzüksüla. Atangji Tsüngremi iba ama ola angashia asenok dang aochitsü aser anebtsütsü Pa mulung-lemtet tulu lir. Tanabuba nung, Political party mesüra candidate itemi shimang ta masü, saka senso rongnung shir dak ajaki tamang katettsüsa pei taküm aser mapa agi sayuteta liteter itemji shimteta asen lima nung aliba memerükba table ajak meküptokja Tsüngrem tenzüker ka ama pei mapang, sempet aser tashi ajak agi pei nübur tenzüksü bendanga agütsüba tanela tajung akar shimba nung shilem agitsüla. Tasembuba nung, yimsüsür, shibai yimli ajak madak Kibuba yimsü asür aser ajak Pa nungi ta chichia amangba senso shimtetba nung tasü ita shilem agitsüla. Tongpang tulu-tila ajak nung akanga nokdaktetba tejen putu mapang tamangdir Mosa, Caleb, Yohua, Daniel, Yosep aser Esther chubatsür nunger dak koda pei kin aser nübur nem tekümzükba dang masü linük nung azükaru, tesünep aser libaliro jenjang ajungketja tenzüktet, item ama nübu Nagaland nung aliba Naga nunger tamanger lanur aika Tsüngremi maoja lir. Asen state ya India nung tanga state ama masü, nütsung yongsüki-a tangar state nung city tila yongsük matoksa, revenue nil state, oda 100% Delhi dak dang metalokerang aliba yazü-majung state ka ta meteta lir, saka iba ama teküboktiba jenjang nungi tangar menepa litettsü Tsüngrem denbo takoktsü lir. Kechiaser politiciaian ket nung masü, Tsüngrem kabu nung dang asen tekümzükba aser tangar menepa anitettsü tashi lir. Asung Nagaland ajungtsü, majungtsü ne meyong agi lemtettsü. Ochi aser temerük shisatsü agi ali yimli yimsüsüba nung shilem magitetra state ya samatsü. (If we don't get involved in politics, we are going to lose this state) Anungji yimten lenir tajung arutsüa ata-a alitsüba mapang masü, saka lenir tajung bushiteta asen lima asoshi Tsüngrem nükjidong tulu atalokdaksüba state sorkar ka mesemtetsüanungji tanü Nagaland nung aliba arogoi tongti shilem agitsü mapang tongja tongago. Teimla makaba tia nungi taküm kümzüktsüba mozü, injection jenjang koma uludir uluaka mapang shitak nung mamshitetra mapayui intoktsüba dak alaka tanga option kecha mali. Jenjang tulu apia meintoki yura ibaji miim rezünga ayuba den saku asütsü. Nübur shilem ajak bendena pei juri ajangzüksü aritepdang nübur ola mezüngmeshiba lenirtem ya jenjang tulu aketba expired mozü den saku lir. Süra, tanü item melen shiri inyaktsü? Benschia aruba tamajung election inyakyim agi memenendaktsüi aliba temerük aser teindang lanur, shir dak nüburi mulungtoka lir, itemji akok tashi nungita shima inyakdaksüra Nagaland nung aliba Naga nunger tang koda teimla ajak samar tekümzüker maliba jenjang nung ali, iba nung kümzüka kechisarena nung noklang bona züsentetba tashi tait senso kumdakja -oda India tuluba nungi tenzüka alima kin ajunga matsüngdang tatishitsü tajungtiba state ka kuma yangertettsü Tsüngremi inyaktsü renema lir. Arogo nung amangbapur telungjemi kodang nübur tiemla aser nungdak ajak Kibuba kabu nung lir ta chichi amanga Pa tashi nung nokdaktet, idangji Arogo ya nüburtemi yongya aliba chichiba temelenshi abenba ajak takoksang Tsüngrem hadir asütsü aser idangji linük nung Tsüngrem yimli aser Pa temeshiba mezüngbuba kumdaktsüba ajanga kinük-kisang tashi hon-yimti yimdong kuma menoktetba yimsüsüba yimli ka Nagaland nung Tsüngremi mesotsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba oset züluri bilemba ken-o ama tazüngerit angateta agitsü mepishir**

## Shamator nung YBBA indang Mission Centre building semzük



August 10, 2021 nü Chairman, Nagaland Bio-Resources, Thronghoku-i Yimkhiung Baptist Borü Amukhungto (YBBA) Mission Centre building semzüksüba sülen tangokba noksa nung angur.

**Dimapur, Luroi/August 11 (TYO):** August 10, 2021 nü Chairman, Nagaland Bio-Resources, Thronghoku-i Yimkhiung Baptist Borü Amukhungto (YBBA) indang Mission Centre building semzüksügo, ta osang ka ajanga metetdaksü.

Iba sentong nung

jembidang Thronghoku-i pa lanur asü dang YBBA nung inyaksema aruba aser sentong balala nung shilem agia aruba lemsatop.

Iba building takok ngua renemba atema pai Executive Secretary YBBA, Dr. S.J. Akhum leniba team nem tenüngsang agütsü.

Iba sentong ya Mission Secretary YBBA, Khalemew leniba nung agi aser Dr. S.J. Akhum-i lokti pelaa agizükba den okila jembida aser Yimkhiung Baptist Borü Amukhungto (Yimkhiung Baptist Church Council) Tir, Rev. B. Hankiu-i building tasenba meshiteta sarasadema liasü

## India nung Khristantemi Dalit nung pusama Black Day among

**New Delhi, August 11 (Agencies):** August 10, 2021 nü India nung Khristantemi Dalit nung pusama Black Day amongo.

India nung Dalit Khristantem nem Scheduled Caste jenjang magütsür aser ibaji tamangba yimsü nung ajemdaker inyakba lir.

India nung Hindu, Sikh aser Buddhist Dalit nung nembo tekümzüka agütsüba densema Scheduled Castes jenjang kübok maongka aser tajangzük balala agütsür.

Küm meyirjang aika Dalit nung bendangshidanga arur aser lokitliba nungi tekübkotiba kinji parnok lir.

Osangbener den jembidang Indian Catholic Bishops Office for Dalits & Lower Classes Secretary, Vijay Kumar Nayak-i, "Linük nung denomination balala nungi Arogo ajaki Dalit Khristantem nem tim temeden agütsüdaktsüner. Onoki iba atemaji inyakdar aser ketdangsertem danga iba onük reprangshiang ta takhangba agütsüdar," ta metetdaksü.

Tang Schedule Caste

jenjang akhangba temeipishiba ken o ya Supreme Court nung benoka lir. Nayak-isa, "Onoki ochi temeden mangu tashi longkak aittsü. Takümsa Supreme Court nung iba ken o angadangsü onoki imlar," ta metetdaksü.

India nung temzüng kübok Dalit nungersa süaka Hindu, Sikh aser Buddhist Dalit nung nem maongka balaka agütsür saka Muslim aser Khristan Dalits nembo item maongkaji magütsür, ibayongji August 10 nü Khristantemi longkak aita "Black Day" among.

Dalit nung loktiliba aser rongsenkettsüng jenjang ajungkettsütsü atema India linük temzüng nung parnok nem sorkar mapa aser shisaliok rejutem nung menden shiteta yutsür.

1950 küm August 10 nü India Tir mezüngbuba, Rajendra Prasad-i sign asüba Constitution (Scheduled Caste) Order (Paragraph 3) nung mezüngbo yamai shia liasü "Hindu yimsü dak alaka tanga yimsü amangertemji Scheduled Caste züngsem asütsü

metemsü."

Sikh nungeri item maongka akhangba sülen parnoka züngoktsü atema 1956 küm temzüng yanglushia liasü. 1990 küm Buddhist nung nema kasa maongkaji agütsü. Dalit Muslim aser Dalit Khristantemia kasa maongkaji akhanger saka magütsür.

Hindu nung billion 1.3 aliba linük, India nung nütsüng shilem 2.3 dang Khristan nütsüng lir aser iba nungjagi shilem 60 shibo Dalit Khristantem lir.

India nung Catholic Arogoi Dalit Khristantem atema kanga bilemja inyaker. Catholic Bishops' Conference of India (CBCI)-i Scheduled Castes/Scheduled classes atema inyakba dang masü saka shisaliok agütsür, court nung temepishiba agütsür aser longkak aitiba sentong ayonga agir.

Black Day ya mezüng 2009 küm ayongzükba sülen nungi CBCI, National Council of Churches in India aser National Council of Dalit Christians-i küm shia ayongzükba agir.

## Mali nung yim ishika amakdang Jihad teloki Khristan 51 tepset

**August 11, 2021:** Amongnü (August 8) Islamic kiralongrartemi Mali nung yimtsüng kar amakba mapang nisung 51 tepsetogo, ta district ketdangser kati metetdaksü.

"Ki aika bensatsüba sülen rongdoktsüogo aser kiset shiruru auyar ao," ta ketdangseri metetdaksü.

Niger den arrtsülen Mali kübok kiralongrartemi Karou, Ouatagouna aser

Daoutegeft yimtsüngtem amak aser parnoki nisung aika tepset.

Tang alima nung Khristantem alitsü tamajungtiba linük 50 rongnung Mali ya jenjang 28buba nung lir. Iba linük nung Islamic kiralongrartemi tashimait sorkar madak tashi amshir aser tang coronavirus wara nung ajemdaker maongka agir.

"Yimlibilema religious freedom atema raratsü asoshi Mali lenirtem atema sarasademjang, iba linük nung Khristantem tashi itshitsü aser züngsem timba akümtsü atema sarasademjang, Jihad züngsemtem temelung meyiptsü aser Khrista osangtajung agizüktsü atema sarasademjang," ta International Christian Concern-i mepishia metetdaksü.

## ANO GO ABEN TSÜNGREM DEN

### TELUMIBA BENJONG AKÜM

Esther aser la tembartem lumibaji Chuba tsüngdang mepishitsü asoshi terenemba liasü. Chubatsür aser lar kilir anogo asem tashi lumibaji bilemdangang! Kibubai la balaka tasü itdaksü. Lai sangdong, "Ni samara, ni samatsü!" (Esther 4:16). Mangyimba anogotem jagi pelatepba anogo sottsü. Chubai lai mepishiba mela. Anungji Yihuda nung "pelatep aser tenüngsang agütsü" (8:16). Tajepba melii asenok koda menütsü akoktsü? Mangyimba melii koda tsüngsangtsü? Yisui ashi, "Shirnoki mang ayimer parnok tepelatsü kechiaser parnok süneptsütsü," (Mt. 5:4).

Ninive Chubai Tsüngrem tauchi asoshi nisung aser shiruru ajaki lumia ayimtentsü ozüng agütsü. Parnoki kechi inyak iba nung Tsüngrem pelaa liasü aser o bendangba agien (Yona 3:7-10). Noklang nok yimti aser jila ajak nung pretshidar. Temenen jateta adoker aser obendangba arulanglang. Ajemalua temulung meyipa aser sarasadem agi dang timtemji nokdangtsü akok. Shirnoki parnok teka abelen aser achichilen mebendangtetter parnok samatsütsü. Pai kodanga mulunga mali. Tsüngremji Kümtetdakba ka lir (4:11). Saka Pai mulungba atalokdaksütsü Pai akhanger. "Kü nüburtemi parnok sasa ajemaludi süra aser sarasademra... Ni parnok lima anebsütsü" (2 Puti. 7:14).

Aikati telumibaji Tejen Lai nung amshia aruba yimya ka dang lir ta melamela ashir. Saka Tasen Lai nunga tamangertemi lumiba nungi tajangzük agia aruba angur. Yisui Tenem nung sayutsüngidang ashi, "Kodang nenoki lumidir" (Lumira ta mashi) (Mt.6:16).

"Lumiba tetezü nendaka shisadangba," ta Oswald Chamberi (1874-1917) My Utmost for His Highest nung zülu. Nai maneni lumira tepela aser Tepela Benjongji ne meyong asütsü (Zek. 8:19).

Kibuba Yisu, lumia sarasademba nungi Tepela Benjong akümtsüsa lumitsü kü dang yariang. Amen.

## Sri Lanka nung Tenla ki amakba ken o nung nisung 25 anema ken o benok

**Colombo, August 11**

**(Agencies):** 2019 küm Sri Lanka nung Easter Sunday nü bomb amshia Tenla kitem aser hotels amakba ken o nung sorkari nisung 25 anema ken o benokogo, ta Bodhbarnü Tir office ajanga metetdaksü.

2019 küm kiralongrartemi taküm tenla agüja pei mang nung bolmb alenloker amakba lendong nung nisung 269 pokseta liasü.

Sri Lanka nung nisung tepsettsü merangba, yarisemba aser hadir bendenba densema anti terror ozüngtem kübok Mongolbarnü nisung 25 anema ken o benok.

Attorney general-i chief justice dang züngsem aseme akümba high court bench ka tenteta tekaraba nung item ken o angadangsü tuyuogo, ta sangdong ka ajanga metetdaksü.

2019 küm April 21 nü Islamic State group den tesendaktep aliba Muslim nung anati kanga atongtepa bomb trok pokdakja liasü. Item bomb ajanga Tenla ki asem aser hotel asem poksatsü.

Ano Muslim nung kata hotel kati atu, saka pai bomb ji mepokdaksü ayazüka aoba sülen tanga tesem ka nung ang bomb ji pokdakja liasü.

Iba tatalokba sülen taoba mapang linük Tir, Maithripala Sirisena aser taoba Ato kilonser, Ranil Wickremesinghe na nem tai tonglokja liasü, kechiyong foreign intelligence ajanga lendong ataloktsü osang jelia metetdaksür liasü saka sorkari iba lendong menokdangteti liasü.

Iba sülen 2019 kümsa election agia linük secutiry nung ajemdaker Gotabaya Rajapaksa Tir shima liasü.

Rajapaksa ya taoba mapang army officer ka aser defense official ka liasü. Tamil Tiger kiralongrartem nokdangba aser küm 26 civil war tembangba nung pai tongti shilem agia liasü.

Linük yimtiba, Colombo nung Roman Catholic tongti putir, Malcolm Ranjith-i mapang shia sorkari Easter anogo nung Tenla ki amakba tatalokba junga bushisüngdang masür ta aiben sorkar aija iba ken o junga bushisüngdangtsü takhangba agüja aruogo.

**OLONG PAITEP # 5903**

1				2						3		
4								5				
						6						
				7								8
		9										
								10				
11												
13												

<b>TIPIEN</b>		<b>LANGTSÜNGLEN</b>	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

**OLONG PAITEP # 5902 TELANGZÜBA**

<b>TIPIEN :</b>	<b>LANGTSÜNGLEN :</b>
1. Yimlibilem, 4. Anak, 5. Tangar,	1. Yongya, 2. Moko, 3. Marok,
7. Aya, 8. Arong, 11. Par,	5. Teronem, 6. Nung, 8. Amajok,
13. Lemjem, 14. Oagi, 15. Mulung.	9. Jangzü, 10. belem, 12. Rong.



**ALOKBA DANG LENIR AJAKI KANGA-SA JASHIR**

**Politician & Bureaucrats** : Hai ... Alokba 'Lilir Tongtiba'...Nai mapang shia onok anema ken o tamajung aika zülur.... Na anema Court nung Case agütsütsü ako-di.

**Linük tenzüker & Yimsüsür** : Mr. Alok...Nai onok Linük Tenzüker & Yimsüsür anema o tamajung aika zülur...Na kenubo onoki salangi jaoka tenarong mesuktsü ako-di.

**Arogo/Mungdang** : Adianu Alokba...Nai mapang shia onok Arogo & Mungdang tenzüker Tenzüker/lenir Deacon menden tenung menukja züluba ya kanga-sa maginur-a noo.

**Lilir Alokba** : Ena...Putu aika iba ama sabang ka maka...Tenük tapok ama lia aruogo. Saka tanü-bo iba sabang ajanga....Nubur mulongba/tebilemba/taginüba ajunga sadakjema metetdaksür.... Aser iba ya kü kija ola masü...Iba yanubur aika ola ako...Ni chiyunga lia/aonung mejanga lia/yimdong nung senzüa lia nubur aikati Phone nung yama-ia zülutsüla...Ano yama-ia ola adoktsüla ta shisa agütsür....Anungji jashitsü melena....Kanga pelatsüla.

- Lilir : L.Kika Pongener.

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Kokrok**  
(adj) teberem kolepa aluba (hunch)  
· Tar talang nisung teberem melamelaa **kokroker**.

**Kolep**  
(v) metonga aliba koa alu ( bend)  
\* Tetsüng tashimaitba agi **kolep** aser lao.

**NAI-A YA METETTER MA?**

**AUGUST 12 NÜ NUNGTUKO NISUNG ASORTEM KAR :**

Sara Ali Khan Aug 12, 1995  
Sayyeshaa Aug 12, 1997  
Vikram Sarabhai Aug 12, 1919  
Muhammad Zia-ul-Haq Aug 12, 1924  
Teji Bachchan Aug 12, 1914  
Madhavi (actress) Aug 12, 1962  
Siva (director) Aug 12, 1977  
Naresh Trehan Aug 12, 1946  
Sitaram Yechury Aug 12, 1952  
Stefanos Tsitsipas Aug 1998



Sara Ali Khan

**TANÜBO NAI LANGZÜANG**

Q. Tawa asayamung "Tokyo 2020 Olympics" nung koba linüki medal tiemtiba angu?  
[A] China [B] Japan [C] USA [D] Germany  
===== (Taruba adok nung onoki langzüsü)

**YASHI ADOK TELANGZÜBA : Uttarakhand**

**SUDOKU # 5943 TELANGZUBA # 5942**

4	6	7		2	3			9	3	6	8	4	9	2	5	1	7	
					7	8			5	9	7	1	8	3	6	2	4	
		3						7	4	4	2	1	6	5	7	3	8	9
						3			1	7	5	2	6	8	4	9	3	
	7	8	4	3					9	3	2	7	4	5	1	6	8	
1	3					7	9		8	4	6	3	1	9	2	7	5	
7	2			8	9			5	6	8	9	5	3	1	7	4	2	
			1	4	2				2	5	4	8	7	6	9	3	1	
8		5	2	6				3	7	1	3	9	2	4	8	5	6	

**OJANG LUTEP # 5488**

TSTAÜ :

NGTALA :

AKAJ :

SHANGEISADR :

APMA :

MAKÜ :

BAJINYAKISA :

TILOK :

EMATA :

TAGTIBJUNA :

**OJANG LUTEP TELANGZÜBA # 5487**

**TAKOK TAJUNG ANGUDANG TAKOKER DANG MASÜ SAKA TANGASHIR AJAK PELATEPER**

**TAN HOPTA ATEMA - KOMA SÜLA ?**

Q. ABAM kübok arogothem nung sannükertem ya ABAM-i dang shimer mapang mapang shia, government mapa inyakertem amato, mapang apir arogo balalai transfer and posting yoka tenzükdaktsü nunga koma süla ?



Shimla, August 11, 2021: Bodhbarnü Shimla nung State Assembly kima Himachal Pradesh Assembly nung Opposition lenir, Mukesh Agnihotri leniba nung Congress MLA temi linük wako amer longkak aitba noksa nung angur.

### Tzüngluruwa mongpu Lok Sabha senden anojungi tembangogo

**New Delhi, August 11 (Agencies):** Bodhbarnü-a Lok Sabha nung opposition-i onük balala nung o lemteptsü takhangba agüja longkak aitba sülen tzüngluruwa mongpu senden anojungi tembangogo; shidakba agibo iba senden ya August 13 nü ang tembangtsü sentong liasü.

Senden temabangba mapang nung Lok Sabha nung Ato kilonser, Narendra Modi-a liasü.

July 19, 2021 nü Parliament senden tenzüka anogo nungi tenzüka opposition party temi Pegasus aser aluyimba ozüngtem densema onük balala nung o lemteptsü takhangba agüja aruba agi senden junga magiteti arugo.

Tan mongpu senden nung Question Hour-a junga magitet, ajisüaka senden nung Constitutional amendment bill densema bill aika agizükogo.

Senden tembanga züngsemtemi tawa asür MP pezü nem akhüm agüja liasü.

Rajya Sabha nunga opposition-i onük balala nung longkak aitba ajanga anüngdang 12:00 ako tashi senden thinena liasü.

Bodhbarnep senden tenzüka sülen Lok Sabha Speaker Om Birla-i, "Ni MP ajak dang Parliamentary inyakyim nung ajemdaker senden amentsü aser

Parliament akhümket züngshitsü mepishir. Yimyim ayimba aser ozülu amer longkak aitba ya Parliamentary inyakyim ka masü. MP temi pei menden nungi dang jembitsüla," ta metetdakja liasü.

Lok Sabha nung Congress lenir, Adhir Ranjan Choudhary-i, "Pegasus ken o benoka jembitsü atema onoki maneni mepishir saka iba ken o mebenoker. France, Germany aser Hungary densema alima linüktemibo iba onük jembir, ajisüaka kechiba onoki akhangbabo sendoker?" ta asüngdanga liasü.

Osangbener den jembidang Chowdhury-i, "Lok Sabha senden August 13 tashi amentsü ta lemteta liasü saka joko senden amentsü menüngdak ta sorkari lemteta senden tembanger. Opposition party temi longjemer Covid wara, totzü jenjang atuba, aluyimba ozüngtem aser Pegasus onüktem nung o lemteptsü atema takhangba agüja liasü," ta metetdaksü.

Osangbener den jembidang Lok Sabha Speaker Om Birla-i, "Senden ghonda 21 ser minute 14 dang amen. Senden junga magitetba atema ni mepelar. Lok Sabha nung Bill 20 agizükogo," ta metetdaksü.

Ano külen osangbenertem den jembidang Congress MP, Shashi Tharoor-i, anogo ana

jelia Lok Sabha senden tembangba atema opposition nem dang tai metongloksütsüla, kechiyong sorkari tekong merangba ajanga iba ya atalok, ta metetdaksü.

Shashi Tharoor-i, "Tang linük nung atalokba kasa onük ajanga tanga linüktema ajak anokshitsüogo, iba ya (Pegasus) alima nung aibelen ken o tuluka lir, saka parnoki (sorkari) iba onük nung o lemteptsü memelungbaji onoki magizükteter," ta metetdaksü.

Opposition-i onük balala nung o lemteptsü atema dang takhangba agütsü, kechiyong Parliament ji onük balala nung o lemteptsü atema lir, ta paisa ashi.

"Nenoki opposition kija nem tai tongloksütsü menüngdak, kechiyong sorkari tekong merangba ajanga opposition-i nokdaksüsa aküm," ta pai ashi.

Mongolbarnü Rajya Sabha nung opposition züngsem aika sabang telungi aiba sülen mangatettep adokba dak sendakba nung tasüngdangba ka langzüdang Tharoor-i, "Senden nung inyakyim shidak beshitsüla, ajisüaka Parliamentary democracy nung ajemdaker Parliament senden akatsüla, saka tejashitsüka BJP sorkari ibaji mazüngshi. Ibaji ajanga shingiaia maginütsüsa yimya beshitep," ta metetdaksü.

### India nung ano nisung 38,353 dak Covid putet

**New Delhi, Luroi/August 11 (Agencies):** India nung ano nisung 38,353 dak coronavirus putet aser tang iba tashidak agi teshirangdakpur 3,86,351 dang kümogo; tesüiba anogo 140 tsüngda linük nung iba tashidak agi teshirangdakpur tang ishiba kümogo, ta Bodhbarnü health & family welfare ministry-i metetdaksü.

Tesüiba ghonda 24 tsüngda coronavirus agi shiranger 497 asü aser tang tashi nung linük nung iba tashidak agi shiranger ajak senteperbo 4,29,179 süogo.

Iba tashidak agi shiranger shilem 97.45 (nisung 3,12,20,981) anepogo aser iba nungji tesüiba ghonda 24 tsüngda shiranger 40,013 anepba densema lir.

Tang linük nung hopta shia coronavirus positive putet

shilem 2.34 kümogo aser anogo shia positive putetba shilema 2.16 dang kümogo, ta Health Ministry-i metetdaksü.

August 10, 2021 tashi nung linük nung samples crore 48.50 tendangogo aser iba nungji Mongolbarnü samples 17,77,962 tendangba densema lir, ta Bodhbarnü Indian Council of Medical Research (ICMR)-i metetdaksü.

Union health ministry-i, tang states/UTs aser nija hospitals nung mamshiba coronavirus vaccine dose crore 2.25 anünga lir, ta metetdaksü.

"Tang tashi nung states/UTs nem coronavirus vaccine dose crore 53.24 dak tema agütsüogo aser dose 72,40,250 agütsütsü renemdar. Tang tashi nung vaccine dose crore 51.9 tutsüogo," ta Health Ministry-isa metetdaksü.



August 11, 2021 nü New Delhi nung Uttarakhand Chief Minister, Pushkar Singh Dhami-i Union Home Minister, Amit Shah ajurudang tangokba noksa nung angur.

### Uttar Pradesh election atema Congress-i election committee tentet

**New Delhi, August 11 (Agencies):** Sangküm Uttar Pradesh nung Assembly elections agitsü lia Bodhbarnü Congress-i iba election atema election committee ka tentetogo; iba committee nungji UP Congress Tir, Ajay Kumar Lallu aser taoba mapang Union Minister tem- Salman Khurshid, Rajeev Shukla aser R P N Singh nung densema lir.

AICC general secretary (organisation), KC Venugopal-i sangdong ka ajanga, Pradesh Election Committee, UPCC tentetbaji Congress Tir, Sonia Gandhi-i agizükogo, ta metetdaksü.

UP Congress Election Committee nung züngsem 24 shim aser parnok rongnung CLP lenir, Aradhana Mona Misra, Mohsina Kidwai, Nirmal Khatri, Pramod Tiwari, P L Punia, Vivek Bansal, Rajesh Mishra, Rajaram Pal, Rakesh Sachan, Begum Noor Bano, Zafar Ali Naqvi, Harendra Malik, Rashid Alvi, Mohammad Muqem aser Acharya Pramod Krishnam nung densema lir.

Osang angazükba agi, iba committee nungsa ex-officio züngsemtemji Uttar Pradesh nung AICC organisations mesüra departments balala nung national Tirtem mesüra chairpersons, party frontal organisations nung tekolakpurtem aser Uttar Pradesh Congress Committee

(UPCC) nung tatong Tirtem aser general secretaries densema lir.

Tamalen UP Congress Tir, Ajay Kumar Lallu-i, sangküm party general secretary, Priyanka Gandhi Vadra leniba kübok party-i UP Assembly election nung tokteptsü, ta sangdonga liasü.

August 9-10 anogotem nung UP Congress-i state nung aliba constituency ajak (403) nung Yogi-i aniba BJP sorkar anema longkak aitba den 'BJP Gaddi Chhodo' ayongzüka agiogo.

Taoba election 2017 Assembly election nung Congress-i menden 7 dang ngua liasü, aser party-i taruba election nungbo asentenshir tokteptsü atema jelia asalentong yanglur.

Taoba ita Priyanka Gandhi Vadra-i, UP election atema lar party-i tanga party tem den lokteptsü melunga dang llir, ta metetdakja liasü.

Lai, "Onok nükjidongji BJP tamakok ngudaksütsü atema lir, anungji tanga party temia lokteptsü atema melungtsüla," ta ashi. Priyanka Gandhi-i, lar area nung teinyaktsü mapa jenti lir aser itemji mimshia inyaktsü, ta ashi.

"Coronavirus wara mapang nung onoki mapa aika inyakogo. Onoki tebilemstü onük balala atema ola adokogo. Ozü party-i küm 30-32 tashi yimsüsüba sülen tashi meiti aküm, ajisüaka onoki kanga meranga inyaka tangbo party tashi itta lir," ta la metetdakja liasü.



August 11, 2021 nü Patiala nung aluyimertem aser alu nung aayangertemi Punjab nung Congress sorkar nem takhangba balala agüja longkak aitba noksa nung angur.



Qatar yimtiba, Doha nung jembishinütsü asoshi U.S. peace envoy for Afghanistan, Zalmay Khalilzad aruba mapang tangokba noksa ka yangi angur. Afghanistan nung kanga kera tensa tamajungba akumba asoshi linük balala lungjemer telangzüba agütsütsü asoshi sentong yanglutsü atema Khalilzad ya Doha nung lir, ta U.S. State Department ajanga sangdong ka nung ashi.

## Algeria morok mi nung nisung 42 asü

**Algiers, Luroi/August 11 (Agencies):** Algeria nung morok mi adoka nisung 42 takum samaogo aser mi ya mapa tamajung inyakba nungi tenzük, ta ketdangsürtemi Mongulbarnü ashi.

Mongulbar aonung tashinung asürtem ya sepai 25 aser civilian 17 liasü.

Social media nung noksa prokshiba nung linük yimtiba, Algiers anüdoklen Kabylie region nung aliba arem nung mi ya jara tulu amai jangrua aser mokozü agi lungbanger aliba nguogo.

Tawa linük aika nung morok mi adoka lir, aser item rongnung Greece, Turkey, Cyprus aser United States anüolen dena lir.

Tir Abdelmadjid Tebboune-i tweet ka nung sepai 25 asüba mangyima zülua liasü. Parnok

ya morok mi adokdak tiyongtsü, Bejaiea aser Tizi Ouzou nung nüburtem kumzükba mapang asü.

"Bejaiea aser Tizi Ouzou nung aliba tenemtem nungi senso 100 shi mi lendong nungi takok ngua kumzükta sülen sepai 25 asüba osang angashia temolung shiranger," ta tiri ashi.

Sepaitemi mapa tajung inyakba ajanga tetsür, tebur aser tanur 110 takum kumzükogo, ta defence ministry ajanga ashi.

Ano maneni sepai 14 shi yirua liasü.

Tizi Ouzou aser Setif area nung civilian 17 asü, ta Ato Kilonser Aimene Benabderrahmane-i Mongulbar aonung ashi.

Iba morok mi adokdaksürtem ya linük north tsütsü Medea district aser

Annaba nung puogo, ta state radio ajanga ashi.

Linük north tsütsü state 18 nung morok mi ya tesem 70 dak tema nung adok, aser item rongnung Tizi Ouzou nunga tesem ter nung adoka liasü.

North Africa nung aliba Algeria linük nung Mongulbarnü temperature ya 46 degrees Celsius (115 degrees Fahrenheit) ajungtsü, ta tsüngsang-mopung dakzürtemi ashi, kong tzi agi kanga anünga lir.

Interior Minister Kamel Beldjoud-i Tizi Ouzou semdangba mapang, mapang kasa nung mi tesem 50 nung adokba ya tamakoktsü mapa ka lir, ta ashi.

Tesüiba küm ishika tsüngta Algeria nung morok mi tulu adokdaksür nisung aika puogo.

## Myanmar-i Rohingya nunger nem COVID mozü agütsütsü tebilemba mali

**Naypyitaw, Luroi/August 11 (Agencies):** Myanmar ketdangsürtemi linük anüdoklen Rakhine State nung teshimtet telok kar nem COVID-19 anema mozü agütsü tenzükba mapang camp tem nung mesütepa tsüngtana aliba minority Rohingya Muslim nunger nem iba mozü agütsütsü sentong kecha mali, ta mitkari shimteta local administrator kati ashi.

2017 küm mitkartemi operation agiba mapang Rohingya nunger meyrirjang aika Bangladesh yutsür jena ao aser yangji anüngzuka alirtemi parnok ya senso ka ama mezüngshir aser timi mamshir, ta ashir.

Rakhine State nung ketdangsür Kyaw Lwin-i osangbener dang Sittwe township nungi ashiba agi, yangji mozü 10,000 agütsüba maparen tenzükogo aser mezüngbuba nung teintet rogo, healthcare nung inyaker, sorkar mapa inyaker aser Buddhist monk nem agütsütsü.

Sittwe nung aliba camp tem nung Muslim nunger nem mozü agütsütsü asoshi tangpo sentong mali, ta pai ashi.

Iba sentong yagi Rohingya nunger bendanga amshir asü, ta asüngdangba mapang, "Onok totuyuba sülen anidaker dang lir," ta pai ashi.

"Mozü anguba aser onok nem totuyuba agütsüba nung ajemdaker onoki inyaktsü. Iba atema tang tashi totuyuba kecha agüja mali," ta Kyaw Lin-i ashi.

February 1 nü mitkartemi sorkar atsüngdokba sülen Myanmar nung coronavirus den raraba jenjang kangasa mejungi akum, kechiaser health worker aika longkak aita mapa meinyaki anena liasü, saka tang mitkartemi mozü agütsüba maparen inyaker, kong iba tashidak menatepa aoba jenjang tamajungtiba nung lir.

Tawa anogo ka nung nisung

300 jungnüa asü, ta ketdangsürtemi ashir, koba health ketdangsürtemibo tamang makar.

Sittwe nung Buddhist nungertem nungi balaka yutsütsü mechi Rohingya nunger ya barbed wire agi mesangbanger kanga mesütepa lir, aser yangjia coronavirus ya pokteta lir, ta yangji alirtemi ashir.

Mozü angunungbo agütsütsü asoshi arishi küm 60 nungi tema nisungtem tenüngbo ketdangsürtemi meshiogo, saka tang tashi osang kecha mali, ta Thet Kal Pyin camp nung alir arishi küm 51 tain Nu Maung-i osangbener dang ashi.

Pa daka COVID symptom liasü, saka tendangtsü asoshi mozü kidangi motet, ta pai ashi.

"Nisung aika shiranger. Aser kar süogo, shirnok taintem timba liasü," ta pai ashi.

Sittwe anasa Phwe Yar Gone aser thet Kal Pyin camp tem nung ketdangsürtemi mozü agütsütsü asoshi renemshitsü atema shinga yoka mali, ta yangji alirtemi ashi.

Rohingya nunger 140,000 shi pei kidang nungi pilar Rakhine state nung tesem balala nung prokshia lir, ta asadangteta lir. Parnok ya timba camp tem nung alir, aser Sittwe housing nung aser temeket nung nisung 100,000 shi lir.

Ano Rohingya nunger ya million tesadang ka shi Rakhine kübok yimtsing balala nung alir.

Senior General Min Aung Hlaing lenisüba kübok mitkartemi 2017 küm operation agiba mapang Rohingya nunger 700,000 shi Rakhine yutsür Bangladeh nung jenoka liasü. Senior General Min Aung Hlaing ya tang ato kilonser aser Myanmar mitkar tekolakba lir.

Bangladesh nung aliba camp tem nung mozü agütsüba maparen tan hopta tenzük, kong Rohingya refugee million ka dak tema lir.

## Afghanistan lenirtemi parnok aser linük asoshi raratsüla: Biden

**Washington, Luroi/August 11 (Agencies):** Taliban teloki linük nung tesem timba agiyonga aoba mapang US Tir Joe Biden-i Afghanistan lenirtem dang pei linük asoshi raratsü ajungshi.

"afghan lenirtem lungjemtsüla. Afghan sepaitem ya Taliban dang timba lir, aser raratsü tejangraba alitsüla," ta Biden-i White House nungi osangbener dang Mongulbarnü ashi. "Parnoki parnok asoshi raratsüla, par linük asoshi raratsüla."

US tiri Afghanistan nungi par sepai anizüker arutsü telemtetba agiba atema sasa mebilemer, ta ashi aser yangji küm 20 dak tema raraba mapang Washington-i sen trillion \$1 dak tema indokogo aser sepai meyrirjang aika takum samaogo, ta ashi.

Paisa, US-i maneni Afghan sepai nem tayimtsü nungi, chiyongtsü, osetsüset aser itasen nung teyari agütsür, ta ashi.

Kasa mapang Taliban-i Afghanistan nung provincial

yimtiba talila asem rakzükogo, ta ketdangsürtemi Bodhbarnü ashi, anungji linük nung aliba province 34 nungi telungpur telok küboki tuko aitogo.

Linük northeast tsütsü Badakhshan aser Baghlan province indang yimitem aser anüolen tsütsü Farah province indang yimtiba rakzükdaksüba mechi linük indang central sorkar nem tebilemstü khuret tali agütsür.

Iba telok yagi Faizabad, Farah, Pul-e-Khumri, Sar-e-Pul, Sheberghan, Aybak, Kunduz, Taluqan aser Zaranj indang provincial capital tem amokbangogo.

Bendanger sepaitem anüngzuka aliba ainshi tenzükba mapang Taliban teloki May ita nungi tesem balala makyonga arudang Afghanistan nung yimtsüng jenti par küboki aita daksüogo.

Tang Taliban teloki Afghanistan shilem 65 dak tema amokbangogo, provincial capital 11 agütsü amokmerener aser north tsütsü Kabul ya akhi

mapang nungi teyari agütsürtem nokdangtsü meranger, ta European Union nungi ketdangsür kati Mongulbarnü ashi.

Kabul nungi Al Jazeera indang osangbener Rob McBride-i ashiba agi, Afghanistan indang map anogoshi melenshir.

"Sorkar tsütsü nungi noksa mejungi kumogo, talisa linük north tsütsü aser parnoki yimsü asüba tesemtem sama aor. Tang linük north tsütsü sorkari akangakanga amokbanga aliba tesemji kangasa tongtipang yimti, Mazar-i-Sharif ya dang lir," ta pai ashi.

Linük north tsütsü lenirtem ajungmesotsü asoshi Mazar-i-Sharif-i Tir Ashraf Ghani aoba mapang linük south tsütsü rara tesashiba akum, ta pai ashi.

Küm aika linük north tsütsü aliba tesemtem ya Afghanistan asoshi tesunep aliba region ka liasü, kong Taliban telok kanga ajema liasü. Saka iba telok yagi tangbo north tsütsü temolung agüja north, west aser south nung aliba border crossing tem

agia Kabul anasai aor.

Afghanistan nung yimjung aser tesunep alitsü asoshi linük balalai Qatar nung maneni jembishinür.

Tang jembishinüba nung takok ngutetra, Afghan nunger kisung yimjung ken o jembitsü asoshi sangdongtsü akok, ta Qatar yimtiba, Doha nungi osangbener kati ashi.

Taliban yagi US-i nungitba sorkar madak takok ngua tanaben yimsü asütsü meranga rarar.

Doha nung iba telok indang political office nungi odongtar kati Mongulbarnü osangbener dang ashiba agi, parnok bendanga agütsür jembishinütsü meranger aser iba ken o jembishinüba meraksanür.

Sorkar meyong sepaitem busema US-i tayimtsü amshia tesem kar nung amaker. Tayimtsü amshia tesem kar amakba ajanga Taliban dak kongshitsü saka yangji talenba lir, ta Department of Defense indang odongtar John Kirby-i ashi.

"Tayimtsü amshia amakba ajanga ali nung tebilemstü ajak koktettsü ta shingaia mashi. Onoki ibaji kodanga mashi," ta Kirby-i ashi.

Tawa linük north, west aser south tsütsü provincial capital kar Taliban teloki amokbangogo, ta Taliban aser sorkar ketdangsürtemi ashi.

Province 34 nungi 25 nung maneni rarar aser taoba ita ana tsüngta kibong 60,000 tesem balala nung jenshia lir, aser parnok ya timba Kabul nung atsükoka lir, ta Afghan national disaster authority nung tekolakba, Gulam Bahauddin Jailani-i ashi.

EU züngsem linük trok-i par bloc indang executive dang Afghan nunger jenoka alitsü Europe nung tesem bushirtem par linüki meyipa yokba anena ataba asoshi tekumdangtsü ashir, aser 2015-2016 mapang Middle East nungi nisung million ka dak tema asylum bushia arudang atalokba ama timtem ajurutsü akok, ta tekumdangtsü shiogo.

# Noklak nung Flag Rally ka ayongzüka agi



August 11 nü Noklak jila nung Flag Rally sentong nung shilem agirtem tangokba noksa nung angur.

**Dimapur, Luroi/August 11 (TYO):** India nüjiso ngur küm 75 ajungba (Azadi Ka Amrit Mahotsav) nungtem nung August 11 nü Noklak jila nung Flag Rally ka ayongzüka agiogo. Sentong nung Deputy Commissioner, Noklak, Hiazu Meru-i, British nung yimsüsüba nungi 1947 küm India nüjiso anguba indang lanurtem den lemsatap. DC-isa, parnok dang

linük asoshi pei akokba yari teyari agütsüsü ajungshia liasü. Kasa mapang nung pai, linük ajunga den Nagaland nung district tasenba; Noklak-a renlokyonga aotsü imlaa ataba lemsatapa liasü. Maneni Meru-i sentong nung shilem agi ajak danga kanga pelaba metetdaksü. Flag rally ya jila teyongtsü nung tenzük aser DC office-i ao kong sentong tatsüka agia liasü.

Iba sentong den külemi Noklak jila nung lenmang tezülen süngtong atemba sentonga ka repsema agiogo. Flag rally sentong ya Nehru Yuva Kendra Tuensang (Noklak Unit)-i Noklak District administration den longjemer ayongzük aser SDO (Civil) C. Phuniang aser EAC Sadar, Noklak, P. Pukha Lam na officers in-charge liasü.

# Dimapur police-i ozüing raksartem apu

**Dimapur, Luroi/August 11 (TYO):** August 11 nü Dimapur police-i nisung pur aoba aser auyaba ken o nung nisung asem puogo. Police-i puer alirtem ya Kavito Chishi (37 yrs) (2) Mughato Awomi (22 yrs) 'Razoupeyu NSCN-IM' aser (3) Vinoka Zhimo (32 yrs) 'Pvt. NSCN-U' ta jangjaogo. Parnok asem ya taoba mapang labour

contractor tem pur aoba ken o nung East Police Station, Dimapur nung ken o benoka aputsü bushia liasü. Iba ken o dak sendakba nung nisung asembo puogo. Kasa mapang nung August 10 nü Dimapur Police Special Branch-i, rakzükrakdemer ka puogo. Aija alisang ya Asukha Achumi (37 yrs) ta jangjaogo. Pai FCI godown, Dimapur

anasa tata gari anishirtem nungi sen rakzükrakdemba atema apu. Pa ket nungi NNC yearly vehicle tax aser Truck owners association indang tax slip balala den sen 3000 aser scooty ka ta puogo. Pa anema SBN Police Station Dimapur nung ken o ka benokogo, ta Addl. Dy. Commissioner of Police/PRO sangdong ka ajanga metetdaksü.

# Tsümar ka tata gari agi menüingset

**Dimapur, August 11 (TYO):** August 10 nü mejangjaba tsümar ka (arishi küm 35 shi) Dimapur, Railway siding tesem nung tata gari kati menüing. Asüsang ya jean pant den vest tanak ka semer liasü.

Temzüing ozüing kübok maparen ajak tembanga inyakba sülen PM examination/identification atema tasü mang ya District Hospital Dimapur-i benerogo. Asüsanger kinunger aser

medemertem dang Officer-in-Charge, GRPS, Dimapur den tongteprateptsü atema mepeshia metetdaksür, ta Addl. Dy. Commissioner of Police (Crime) & PRO, Dimapur sangdong ka ajanga metetdaksü.

# Zunheboto DPDB senden nung Covid-19 jenjang metetdaksü



Deputy Commissioner aser vice chairman DPDB, Zunheboto, Peter Lichamo lenisüba nung Zunheboto District Planning and Development Board senden amenba noksa nung angur.

**Dimapur, Chiteni/July 11 (TYO):** August ita atema Zunheboto District Planning and Development Board senden August 11 nü DC conference hall nung menogo. Iba senden ya Deputy Commissioner aser vice chairman DPDB, Zunheboto, Peter Lichamo lenisüba nung agia liasü. Senden nung India nüjiso ngur küm 75 ajungba nungtem nung district aser sub-division tem nung benjung ayongzüka amungtsüba indang tongtibangsa jembi. Iba dak sendakba nung DC-i,

department balala indang maparen metetdakja liasü. Kasa mapang nung Dy CMO Zunheboto, Dr. Akaho Sema-i, district nung covid tensa indang osang tejangja metetdaksü. Pai, District kübok testing facility 35 amenoka department-i sample tendangba inyakyim ajungketogo, ta ashi. Paisa, taoba anogo 9 tsüingda sample 3,999 tendangba rongnungi nisung 57 dak tashidak keta aliba potetogo, koba shilem 1.4% lir aser kangabo lendong keta mali ta ashi. Dr. Sema-isa, taruba anogo

20 tsüingda sample 1,000 tendangtsü par team nükjidong lir ta metetdaksü. Maneni board züingsemtem dang district nung vaccine dose 42,855 agütsür aliba indang pai metetdaksüba den yimtsüing 13 nungbo temsüa alir yimdaklir ajak nem vaccine agütsüjemogo, ta ashi. Tatem nung pai temsüa aliba lisopur shilem 15 nem ano vaccine magütsüi lir, ta metetdaksü. Senden nungsa board-i aspiration block tanaben tentetshitsüba densema tanga onüktem benoka sensaksema liasü.

# Menungra Bilemteter

**Asür T. Apokla (Unger)**  
Asü : 12-8-2020



Temeim Oja, Nai onok toktsür orr küm ka jungaka na onok den teti ali ama bilemer, na tongmelang, teinyak aser teti ochi pusemersa lia aruba onoki bilemteter. Tanü iba anogo na bilemteta sarasadema amonger.

*Nü temeim Chirnurtem,  
Semchirtem aser Kinungertem.*

# Peren nung youth march sentong agi



India nüjiso ngur küm 75 ajungba nungtem nung Agustus 11 nü Peren nung youth march sentong ayongzüka agiba mapang tangokba noksa nung angur.

**Dimapur, Luroi/August 11 (TYO):** India nüjiso ngur küm 75 ajungba nungtem nung August 11 nü Peren nung youth march sentong ka ayongzüka agiogo.

Gandhi-i aniba 'March' ajanga ajungmesoba sentong ka lir ta ashi. ADC-i lanurtem dang pei sasa nokdaktetsü atema ajungshiba den tangar dak memetaloki aliba linük ka nungdakba indang lemsatapa liasü.

Iba sentong ya Govt. Higher Secondary School nung tenzük aser Additional Deputy Commissioner's Office, Peren nung tembanga liasü.

Government College nungi National Service Scheme aser Nehru Yuva Kendra Peren volunteer tem den district administration aser public relations department sentong ayongzüka agiba tetezü ketdangsürtemi iba sentong nung shilem agia liasü.

# Peren DC-i metetdaksür

**Peren, Luroi/August 11, 2021 (TYO):** Tan ita DPDB senden nung lemtetba ama aruya aliba Independence Day (15th August 2021) benjongmung dak sendakba nung, Deputy Commissioner Peren, Sentiwapang Aier, NCS-i sangdong ka ajanga, Bresthibarnü (August 12, 2021) nübodok mapa inyaktsü, ta metetdaksü.

pei pei nem lezmüksüba tesem tonga arutsü asoshi teyur.

Pei nem lezmüksüba tesem nung mapa inyakdang amshiba hadirtem shitak bendentsü asoshi Department ajak dang mepishir aser iba den külemi pei pei department ajanga süngo jemtsü anepalutsüla, ta kasa sangdong nung shia lir.

Iba nübudok mapa dak sendakba nung, Peren District kübok Office ajak nung staff tem medema shilem agidaksütsü asoshi Heads of Office tem dang tetuyuba agütsüsüla aser Bresthibar anepdang 9:00 ako shitak nung

Maneni, DC-isa iba anogo Department ajak nung tenüing züludentsü asoshi EAC Peren, Kevethito Rose nem nungloksüogo aser iba nübodok mapa nung lezmüksüba ama meinyaki department kari danga tamakok ngudaktsüra tasüingdangba den temerenshi tapet agütsüsü.

## Messi-i PSG den küm ana atema tenangzüktepba yangluogo



**Luroi/August 11, 2021**

**(Agencies):** Argentina nunger nungtugu football asayar Lionel Messi-i French League club Paris Saint-Germain (PSG) den küm ana atema tenangzüktepba ka yangluogo. Pa Mongolbarnü Paris-i aoba sülen iba tenangzüktepba yanglua liasü.

PSG pusemertemi airport-i oa "Messi! Messi!" ya ayimtena asayar ya pelashishia agizüka liasü.

Barcelona nungi asayaba mapang Mess-i Ballon d'Or titles trok koktetogo aser iba ajanga pa alima nung asayar tajungtiba rongnung ka ta sayur. Taoba küm Barcelona den tenangzüktepba yanglur aliba tembangba sülen Messi ya free agent ka aküm. Pai Barca nungi pa indang taa ajemshir asayatsü mulunga agizük, saka Spanish league financial regulations ajanga pa arishi küm 13 asüba mapang nungi asayaa aliba club nungi masayatetsüsa aküm.

2017 küm Neymar anir arutsü atema PSG-i Barcelona nem euro million 222 agütsü

saka Messi atemabo transfer fee kecha mali.

Saint-Germain-isa Messi den tenangzüktepba kübok küm ka atsülangtsü atema lenmang sadema lapoka yuogo. Pa alizükba taa indang osang tejangja magütsü saka New York Times sangdong ka ajanga ashiba agi, Messi nem küm nung USD million 41 agütsütsü. Messi career ajunga Barcelona nung dang mapang intok saka pa den tenangzüktepba yanglur aliba tembangba sülen telok ana tsünda tenangzüktepba tasen ka yanglutsü atema haihaora mekatet. Pa den tatensa USD million 674 yong küm pezü atema tenangzüktepba yangluo aser pa maneni Braca nungisa asayatsü atema taa ajemshir agütsü pai mulunga liasü.

"Paris Saint-Germain nung chapter tasen ka tenzüktsü yongyaa atar. Football dak sendakba nung club inyakyim ajak kü nükjidong den kanga puteper," ta Messi-i Mongolbarnü ashi.

"Idaki sempet tajung aketba

asayar aser staff tem aika lir ta ni meteta lir. Club aser fan tem atema takok tajung ngutsütsü asoshi teyari agütsütsü ni mulungteter lir aser Parc des Princes nung asayatsü yongyaa atar," ta paisa ashi.

2019-20 season nung Messi-i Barcelona atema La Liga nung asaya 33 nung goal 25 idaktsü aser assist 21 süja liasü aser 2020-21 season nung asayar 35 nung goal 30 aser assist teku sütsüo.

Messi den tenangzüktepba meyangu tsünda PSG-i Spanish defender Sergio Ramos, Dutch midfielder Georginio Wijnaldum, Italy nung goalkeeper Gianluigi Donnarumma aser Morocco nung fullback Achraf Hakimi alizükatoker liasü.

Barcelona nung goal timtiba idaktsür aliba asayar arua adenba ajanga Champions League akoktsü atema PSG nükjidong aliba ataloktsü timla agütsür. Messi-i Barcelona nungi asayaba mapang Champions League title pezü aser La Liga title 10 kokogo.

## India U-18 compound archer temi otsü tasen ana yangluo

**Luroi/August 11, 2021**

**(Agencies):** Wroclaw, Poland nung tang asayaa aliba World Youth Championships ranking round nung India tsür compound team aser temeyoktep team-i Mongolbarnü Under-18 world record tasen ana yangluogo

Tetsür team nung Priya Gurjar, Parneet Kaur aser Ridhu Senthilkumar nunger senteper point 2067 angu, koba taoba record dang nungi point 22 agi timba liasü.

Priya-i point 696 nguteta kija asaya akok aser kasa mapang nung Parneet Kaur tasembuba aser Senthilkumar pezübuba jenjang nung asaya tembangba liasü.

Taoba mapang America nunger Keane Sanchiko, Breanna Theodore aser Savannah Vanderwier nungeri

2017 küm Rosario nung asayaba mapang point 2045 nguteta otsü tasen ka yanglur liasü.

Kasa mapang nung Priya aser Kushal Dalal (705) nati tarep asaya nung point 1401 nguteta otsü tasen ka yangluogo, koba Denmark nunger asayar Natacha Stutz and Mathias Fullerton (1387) nati 2019 küm Madrid World Youth Championships nung yanglur liasü.

"Ni kanga pelar saka ni tanü dang nungi tajungba khatettsü. Ni shots tajung akhatsü nungdaker aser tajungtiba asayatsü merangtsü, ajita asünungdang result tajungba ngutettsü. Ni world champion akümstsü nükjidong lir aser ni takokba tashi tajungtiba asayatsü merangtsü," ta arishi küm 17 tain Priya-i ashi.

Kasa mapang nung Compound U-18 team tanabuba jenjang nung tembangba aser individual ranking round nung Dalal tasembuba jenjang tongteta asayaogo.

U-18 recurve world champion Komalika Bari, shiba Under-21 nung asayaa liasü lai point 656 nguteta jenjang trokbuba tongtet aser India tetsür team senteper point 1905 nguteta jenjang pongbuba ajangzüksetogo.

Kasa mapang nung recurve U-21 tebur team tanabuba jenjang nung tembangba liasü. India nunger asayatem rongnungi Parth Salunkhe-i point 663 nguteta kija asaya nung jenjang tenetbuba tongtetogo. Tebur team-i ajak senteper point 1977 nguteta Russia sülen tanabuba jenjang nung tembang.

## Paralympics Eurosport India & DD Sports nung sayutsü

**Luroi/August 11, 2021**

**(Agencies):** Aruya aliba Paralympics nung India nunger fan temi linük nungi para athletes tem asaya Eurosport India nung reprangtetsü. Paralympic Committee of India-i iba asayamung sayutsü asoshi Eurosport India nem temeden agütsüo.

Tokyo Paralympic Games koba August 24 nungi September 5 nü tashi asayatsü lir, iba asayamung ya India nung Eurosport-i sayaba mezüngbuba global multi-sport event ka asütsü.

"Eurosport ya onok indang Media Broadcasting Partner asütsü aser parnoki taruba Tokyo 2020 Paralympic Games live sayutsü," ta PCI, secretary general Gursharan Singh-i sangdong ka ajanga metetdaksü. India-i iba asayamung nung asayatsü atema taküm asayar timtiba yoktsü aser Paralympic athletes

54-i asaya teku nung shilem agiba angütsü.

Asayatem rongnung javelin asaya nung world No.3 aser world No.2 Sumit Antil aser Sandeep Chaudhary, Shooting nung Manish Narwal (10m air pistol), Singhraj (10m air pistol) aser Avani Lekhara (10m air rifle, 50m air rifle) aser high jump nung Mariyappan Thangavelu densema lir. Thangavelu ya India team wako amsang asütsü.

Paralympic Games nung taküm mezüngbuba Badminton asayatsü aser India nunger rongnungi Pramod Bhagat, Manoj Sarkar, Tarun Dhillon, Suhas Yathiraj aser Krishna Nagar nunger den tetsür tarep asayar Parul Parmar aser Palak Kohli nungeri shilem agütsü.

Paralympic Games ya August 27 nü nungi tenzuka sayutsü. Eurosport feed ya discovery+ app nunga live sayutsü.

## Odisha FC-i Spain nunger defender Hector Rodas alizükogo

**Luroi/August 11, 2021**

**(Agencies):** Indian Super League (ISL) club Odisha FC-i Bodhbarnü sangdong ka ajanga Spain nunger centre-back Hector Rodas den tenangzüktepba ka yangluba sangdongogo.

Valencia nungi arishi küm 33 tain asayar ya tanur asüba mapang Levante nung asaya aser iba sülen senior jenjang nung reserve team nungi mezüng asaya aser 2009 küm first team nungi asayaa liasü. Maneni pa Spain nung Elche, Betis, Cordoba, Cultural Leonesa aser Alcorcon club nungi asayaogo. Pa 2017 küm Belgian club Cercle Brugge nung oa adenba sülen mezüngbuba bendanger team ka nungi asayaa liasü.

Odisha FC nung adenba sülen Hector-i, "Odisha FC nung adenba atema ni kanga pelar. Teammate tem aser coach tem den ajuruteptsü atema aser ISL atema India-i arutsü yongyaa atar. Ni OFC nung takok tajung

nguner aser nükjidong ka yur onok ajak longjemer inyaktsü," ta ashi.

Head coach Kiko Ramirez-i ashiba agi, "team tactical game ajungkettsü atema nungdaka aliba ama Hector-i defence nung onok nem teyari agütsütsü. Pa asayar tejen ka aser Spain nung first division nunga asayaogo aser pai defensive line azüoktsü atema meteta lir. Pa defend asüba mapang aggressive asayar ka lir aser pai asaya nung telemtetba tajung agütsü atema onok nem teyari agütsütsü. Pai anung ball kanga junga asayateter anungji attack asüba mapang aser defend asüba mapang nunga set-pieces nung teyari agütsütsü."

Odisha FC-i Hector pelashishia agizüka Club tir Mr Raj Athwal-i, "Hector Rodas anir arutetba atema pelar. Europe nung temaba jenjang nung asayaba asayar ka ama pai Odisha nung pa sempet tajung sayuba reprangtsü yongyaa atar," ta ashi.

## YRS ajanga metetdaksür

**Dimapur, Luroi/August 11, 2021 (TYO):**

Temsüa alir candidate tem, shirnoki 2019-20 küm North East Level, National Level aser International Level nung discipline balala kübok medal nguogo, parnok application agütsütsü asoshi

Directorate of Youth Resources and Sports-i jaoker.

Directorate Office nung agütsütsü asoshi, August 31, 2021 matongdang tim association ajanga temsüa alir candidate temi merit certificate agütsütsüla, ta YRS ajanga tetuyuba agütsür.

## **BILEMDANGANG**

**"Tanü nü inyakyim agi nisung ka danga ajungmesoang."**